

in vita ac moribus sua cuique distribuit. sed etiam ut ipsi iuste uiuant. iusteq; morati sint. sua cuique distribuendo. ut ne minime quicquam debeant nisi ut inuicem diligant. et unde inheretur illi forme. nisi amando. cur ergo alium diligimus quem credimus iustum. et non diligimus ipsam formam. ubi videmus quid sit iustus animus. ut et nos iusti esse possimus. Non vero nisi et istam diligeremus nullomodo cum diligeremus quem diligimus ex ista. sed dum iusti non sumus minus eam diligimus quam ut iusti esse ualeamus. homo ergo qui creditur iustus ex ea forma et ueritate diligitur. quam cernit. et intelligit apud se ille qui diligit. ipsa uero forma et ueritas non est quomodo aliunde diligitur. Neque enim inuenimus aliquid tale preter ipsam ut eam cum incognita est credendo diligamus ex eo quod iam tale aliquid nouimus. Quicquid enim tale aliquid perspexeris ipsa est. et non est quicquam tale. quoniam sola ipsa talis est. qualis ipsa est. Qui ergo amat homines. aut quia iusti sunt. aut ut iusti sint amare debet. Sic enim et semetipsum amare debet. aut quia iustus est. aut ut iustus sit. Sic enim diligit proximum tanquam seipsum sine ullo periculo. Qui enim aliter se diligit. iniuste se diligit. quoniam se ad hoc diligit ut sit iniustus. Ad hoc ergo ut sit malus. ac per hoc iam non se diligit. Qui enim diligit iniquitatem. odit animam suam.

Cap. vii

**Q**uapropter non est precipue uidentium in hac questione que de trinitate nobis est. et de cognoscendo deo. nisi quid sit uera dilectio. immo uero quid sit dilectio. Ea quippe dilectio dicenda. que uera est alioquin cupiditas est. atque ita cupidi abusive dicuntur diligere. quemadmodum cupere abusive dicuntur. qui diligunt. hec est uera dilectio. ut inherentes ueritati iuste uiuamus. et ideo contemnamus omnia mortalia pre amore hominum. quo

eos uolumus iuste uiuere. Ita enim et mori pro fratribus uuliter parati esse poterimus. quod nos dominus ihesus christus exemplo suo docuit. Cum enim duo precepta sint in quibus tota lex pendet et prophete. dilectio dei et dilectio proximi. non immerito plerumque scriptura pro utroque unum ponit. siue tantum dei. sicuti est illud. scimus quoniam diligentibus deum omnia cooperantur in bonum. Et iterum. Quisquis autem diligit deum hic cognitus est ab eo. et illud. quoniam caritas dei diffusa est in cordibus nostris per spiritum sanctum qui datus est nobis. et alia multa. quia et qui diligit deum. consequens est ut faciat quod precipit deus. et in tantum diligit in quantum facit. consequens ergo est ut et proximum diligit. quia hoc precipit deus. siue tantum proximi dilectionem scriptura commemorat. sicut est illud. Inuicem onera uestra portare. et sic adimplebitis legem christi. et illud. Omnis enim lex in uno sermone impletur. in eo quod scriptum est. diliges proximum tuum tanquam teipsum. et in euangelio. omnia quecumque uultis ut faciant uobis homines bona. ita et vos facite illis. hec enim est lex et prophete. Et pleraque alia reperimus in litteris sanctis. in quibus sola dilectio proximi ad perfectionem precipi uidetur. et taceri de dilectione dei. cum in utroque lex pendeat et prophete. Sed et hoc ideo. quia et qui proximum diligit. consequens est ut ipsam precipue dilectionem diligit. Deus autem dilectio est. et qui manet in dilectione in deo manet. Consequens ergo est ut precipue deum diligit. Quapropter qui querunt deum per istas potestates que mundo presumunt uel partibus mundi. auferuntur ab eo longeque iactantur. non interuallis locorum sed diuersitate affectuum. Exterius enim conantur ire et interiora sua deserunt quibus interior est deus. Itaque si aliquam etiam sanctam potestatem uel audierunt. uel utcumque cogitauerunt.